



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

Tir Yimym

tiryimym@aolima

tir yimym

TAPAK 7

**Baba Ramdev-i tatok meshiba  
Supreme Court-i magizüker**

**Eid mapang Ayatollah Ali Khamenei-i  
Israel aser West aitsü**



VOL. XXI ISSUE NO. 178 (ADOK 178) DIMAPUR YANGTEPNÜ (THURSDAY) RONGCHII (APRIL) 11, 2024 ₹ 5.00

## Modi sorkari 'divide & bluff policy' inyaker; Congress-i Arlla 371(A) ya temeshi ama züingshir; kümzuka ayutsü



**Kohima, April 10, 2024 (TYO):** Prime Minister Narendra Modi-i aniba BJP-RSS sorkari lemsar yimsü asüba policy inyakba dang masü saka tiyazü jembia yimsü asüba policy benokogo.

"British nungeri 'divide and rule' policy nung küm 200 tema India madak yimsü süa aru aser tang tesüiba küm 10 tashi Prime Minister Modi kübok BJP-i 'divide and rule' dang masü saka 'bluff and rule' policy nung yimsü süa arur" ta taoba Union Minister Jairam Ramesh-i ashi.

2015 küm Centre-i NSCN-IM den Framework Agreement nung sign sütep aser Modi-i ibaji temelenshi ka ta shia liasü saka

tanü tashi asenoki iba indang osang tejangja memetet ta pai ashi.

"2017 küm ano tanga telok ka den agreement ka agi aser tang tashi iba osang yimjak nung memetetdaksü lir. Nagaland State General Elections atongtsü lia Modi-i Eastern Nagaland Peoples' Organisation dang statehood atema aika nangzük saka tang tashi mapa kecha mali" ta Ramesh-isa ashi.

"Modi-i teti tenangzükba agidang, pai ibaji temelenshi bener arutsüba aser Nagaland indang khuret balala ajak angatetteptsü ta ashir. Tang tashi nübertemi item agreements aser tenangzüktep atema osang

tejangja kecha memetet saka Modi-i nisung balala ashioktsüba asenok ajaki meteta lir" ta paisa ashi.

Nagaland aser linük nung alirtem asoshi tongtipangba tebilemstüji 'näjiso' lir. 1947 nung asenoki 'divide and rule' nungi nüjiso ang aser 2024 nung asenoki 'bluff and rule' nungi nüjiso aginür, ta Jairam Ramesh-isa metetdaksü

RSS-BJP indang tangatetba aser tebilembaji 'One Nation One Election', 'One Nation One Tax', 'One Nation One Party', 'One Nation One Leader', 'One Nation One Religion', 'One Nation One Language', 'One Nation One Food' lir ta pai ashi.

Manipur nung tesüiba 11 tejakdang atalokba aser tang tashi tensa mesüngjemteti aruba ya tetenzük dang. Manipur nung tamangba yimsü aser tereprangtsü nung ajemdaker tesüiba küm 11 tashi tensa mesüngjemteti arur, ta Ramesh-isa ashi.

"Prime Minister Modi-i ola ka danga madok aser Manipur-i mao. Modi-i Manipur Chief Minister mesüra MP tem aser Political Party tem den majurutep. North East state tem nung nisung temeyoktep sernung putepa aliba raksatsütsü atema Manipur nung atalokba ya tanga state tem nunga ataloka aitsü tsüba bilemer" ta Ramesh-isa ashi.

Manipur should be a wake-up call to people in the Northeast - fundamental rights," he said.

BJP-i Meitei, Kuki aser Naga nunger ashioktsüogo aser iba ya 'bluff and rule policy' ajanga lir.

Manipur nung atalokba ajanga Northeast nung alirtem saksalemstüla, ta paisa ayongzük.

"Congress-i sorkar akümba sülen India nung nübertem temeyoktep kümzuka ayutsü kechiyong iba ya BJP-RSS kübok lendong nung lir. Arlla 371(A) kübok Naga nunger nem temetentem agüja aliba kümzuka ayutsü, yamaji mesüra Jammu & Kashmir atema Arlla 370 agienba ama agienadoktsü" Ramesh-isa ashi.

"Congress Party atema Arlla 371(A) ya temeshi lir aser onoki kanga akhümtsübur. Iba Arlla nung temelenshi kar süra tashimait akümtsü aser ibaji talisa ali aser rongsen madak kibur nung kongshitsü" ta paisa ashi.

"Linük nung tebilemstü khuret tulutibaji mapa manguba lir aser tang unemployment rate ji küm 35 nung tematiba lir. Congress indang temeten sentong punguji lanurtem, tetsürtem, aluyimertem, mapa inyakerter aser loktiliba nung tashimaitertem asoshi lir" ta Ramesh-isa metetdaksü.

Constitution ajanga 'Freedom of Speech' agütsür saka BJP sorkar kübok nisung kati o sadoka jembiba sülen temerenshi tulu alir ta pai Modi'er sorkar aitsü.

"Asenoki democracy kümzüksüla aser 2024 election ya democracy aser constitution kümzüksü asoshi lir" ta paisa ashi.

Centre-i 1990s nungi Naga telok den olemtep tenzük aser Congress-ia inyaka arur 2013 nung agreement ka nung sign

süteptsü liasü saka 2014 elections ajanga meinyaktet aser iba sülen Congress sorkar maru ta Ramesh-isa metetdaksü.

Congress sorkar arura Naga teloktemtem den olemteptsü ta paisa shisem.

Nagaland nung atalokba indang putiotsü aika lir saka Naga loktiliba ajak dena tapak tasen ka tenzüksüla, ta pai ashi.

Tesüiba küm 10 tashi Modi'er sorkar kübok terenlok aser tejakleni aoba indang jembir saka Northeast nung mapatongtem inyakba ya Congress sorkar mapang tenzüksüba liasü aser par sorkar mapang renem. Modi-i tesüiba nung tenzüksüba mapatongtem atema tenüng agir. Prime Minister Modi-i Nagaland aser Northeast ya 2014 nungang tenzükba ama bilemer" ta Ramesh-i ashi.

Congress manifesto nung LGBTQIA+ nunger atema ozüng ka latetsü shia alibaji kibong akümba indang masü saka civil union asoshi lir. Tanga state tem nung civil union tenzükogo aser Nagaland nungbo mali saka Supreme Court nung ken o benoka liaka compulsorily masütsü, ta paisa ashi.

Taruba election nung Nagaland nung alirtem aser ano tanga state tem nunga nübertemi Congress dak temulung lema yaritsü aser Modi'er sorkar dang joko ojang ta ashitsü, ta Ramesh-isa ashi.

India nungeri 'bluff and rule' nungi nüjiso aginür, freedom of speech aginür, mapa aser temeten aginür, ta Jairam Ramesh-isa nenshi.

## RPP-i Chief Minister Neiphiu Rio aitsür

**Dimapur, April 10, 2024 (TYO):** April 8, 2024 nü PDA Co-ordination senden amendang Chief Minister Neiphiu Rio-i Naga nunger tamangba aser maitsü atema kümzuka ayutsü ta jembiba aitsür ta Rising People's Party (RPP)-i metetdaksüogo.

"2010 küm CM Rio-i Kohima nung Rani Gaidinliu Library-cum-Memorial Museum lapoktsü temelaba agütsü. Iba ya lapok asübo Heraka aser RSS maparen indang centre ka kümeler lila" ta RPP-i ashi.

Manipur nung Khristantem reshikangshiba, tenla ki 249 rongdoktsüba aser Kuki-Zo nunger reshikangshiba CM Rio-i maitsür ta RPP-isa ashi.

Assam Healing Practices Act ajanga Khristan missions asoshi timtem bentsür arur saka CM

Rio-i iba atema ola madoker. Külen Nagaland University-i Easter Sunday 2024 nung mapa inyaktsü sangdongba pai kecha mashi ta RPP-isa metetdaksü.

Maneni sorkar school ajak nung Yoga tesayurtem shimoker aser Nagaland nung azü shi shishilemba masütsü tenokdangba agütsüogo. Amit Shah-i nashishi noktangba aser school nung Hindi benokba atema Rio-i ola kecha madok, ta parnokisa ashi.

India aser Myanmar tsüngda Free Movement Regime agienba atema Rio-i tejembitsü tim mejembi. Külen, NDPP sorkari Dimapur nung ILP shitak meinyakba ajanga ozüng alema arurtem aser telok tamajungtem aika kümogo ta RPP-i tai tongloksü.

## MLA 60-i yaria regional party candidate ka ama noktaker: Dr. Chumben Murry

**Dimapur, April 10, 2024 (TYO):** Nagaland ajunga ajangzüksü asoshi MLA 60-i mulunga regional party candidate ka ama noktaker ta Lok Sabha election 2024 atema PDA consensus candidate Dr. Chumben Murry-i ashi.

Bodbarnü Jalukie nung election campaign nung jembidang "kodang party balala külemi longjemdir tangatetbatembo melokteper saka common minimum programme ka renemer" ta Dr. Chumben-i ashi.

Pai takok ngura nübo agi tangar memenepertem reshikangshiba tesemtem semdangtsü aser state sorkar den ajuruteptsü ta Dr. Chumben-i ashi.

Yimjung ya odang marur aser angutsü atema merangtsüla. Nagaland nung yimjung atema state assembly nung MLA 60 longjemogo ta paisa ashi.



"Congress candidate ka party ka RPP-i dang pusemer saka PDA consensus candidate ya MLA 60 aser parnok political party lennir ajaki pusemer" ta Chief Minister Neiphiu Rio-i ashi.

"Tsüngrem aser nübertem temeind ajanga PDA consensus candidate-i takok angutsü. Tan election ya takok angutsü tetoktepba ka masü saka votes teimtiba angutsü tetoktepba ka lir" ta CM Rio-i ashi.

"PDA sorkar anema olulu balala prokshir angajemdaksütsü atema nüboyimba sentong agir. NDPP ya PM Modi-i aniba NDA sorkar den sendaktepa lir aser Modi-i Prime Minister ama NDA sorkar maneni tashi angutsü"

paaisa ashi.

Nagaland nung regional party temi kodanga Naga maitsü atema timtem bentsür marutsü aser Constitution nung Nagaland state atema temzüng balaka lateta lir ta Rio-isa metetdaksü.

"MLA ajak longjema lir aser onoki Opposition maliba sorkar akümtsü atema külemi longjem. Iba ya Naga yimten tekaraba nung latetsü atema lir" ta Nagaland Deputy Chief Minister TR Zeliang-ia ashi.

"Ajisüaka MLA 60-i dang Naga yimten latetsü makok. Asenok tsüngda mangatettep alibattem angatetteptsüla aser külemi ola ka adok nung dang yimten latetsü" ta pai ashi.

OFFICE OF THE  
**AO SENDEN**  
*"Kübur Asashi" (For the People)*  
**AYIMOKTSÜR**

Tsürabur mapang nungi asen Ao kin ya Naga nunger rongnung lenla aika nung samanir aser arükhudong süa aru. Tanü putu nung Naga nunger Political Party tem tsüngda tashi raktedang asen kin yimsüyimpong aser sobaliba tajungtem raksaa asen Ao kin tensa tamajungtem ajangshia aruogo. Anungji tanü India yimden sorkar yanglutsü asoshi koba Rongchi (April) 19, 2024 anogo Lok Sabha election agitsüba lir, iba inyakyim nung Ao senso ajaki pei temeden ya kanga senti ta angateta asen lenir shimdang, Naga nunger temeden wazüka yutettsüsa mangdang tejangja akaba aser Naga nunger akhümdong sütettsüsa nübu tajung shimtsüla.

Iba election mapang kin o kin na, yim o yim na, kija aser lokti balala tsüngda rarabangsen, tsükchitep aser keno madoktsü atema tekümdangtsü nübur ajak dang ayimoktsür.

Sd/- (Chubawati Longchar) President  
Sd/- (Imtipokyim) Gen. Secretary

### Kohima College nung Voters Awareness Program agi



**Dimapur, Rongchii/April 10 (TYO):** Electoral literacy temaba jenjangi ajungketsü aser mezüing vote agütsütsüpur ajungmesotsü nükjidong nung April 10, 2024 nü Kohima College Kohima nung aliba Electoral Literacy Club ajanga Deputy Commissioner & District Election Officer Kohima den lungjemer college indang Conference Hall nung Voter Awareness and Sensitization Program ayongzüka liasü.

Mezüing vote agütsütsüpur nem electoral process, pei temeden aser teinyaktsü aser democratic inyakyim nung shilem agiba temelenshi indang angatetdaksütsü mechi iba sentong ya ayongzüka. Sentong nung EAC Kohima and Nodal Officer for SVEEP, Limakumla Pongener-i jembidang, nüburtem nem tangatetba agütsütsü asoshi iba ama sentong tajung ayongzüka atema pelaba lemsatepa liasü.

Election inyakyim nung lanurtemi shilem agütsü kanga tongtipang lir aser mezüing vote agütsütsüpur nem shisatsü aser awareness agütsütsü ya kanga tongtipang, ta lai ashi. Iba sentong nung kaketshir aser tesayurtem shilem agi, kong Associate Professor Dr. Visiezolie Yashü menden liasü, Principal KCK, Dr. Vitsosie Vüprü-i pela agizükba o jembia aser Campus Ambassador Kikhosou Rume-ia tepela o jembia liasü.

### DES ketdangsürtem Delhi nung SDP sensaksem nung aden



**Kohima, Rongchii/April 10 (TYO):** Directorate of Economics and Statistics, Nagaland nung Director Neidilhou Kreditsu-i anir parpongu Delhi nung Joint Discussion on Comparable Estimates of State Domestic Product (SDP) for the year 2021-22 & 2022-23 sentong dena liasü.

Iba sentong ya April 8-10, 2024 anogotem Khurshid Lal Bhavan, New Delhi nung agia liasü. SDP indang estimates ya Finance Commission ajanga State nem sen lemzüksüba nung amshir, ta Department ajanga sangdong ka nung ashi. Finance Commission indang recommendation nung state-i

open market nungi GSDP estimates shilem asem aputsi melar, ta ashi. Tang Nagaland nung GSDP figure ya sen 39,566.21 crore crore lir aser growth rate shilem 7.73 lir aser Sector wise nung services sector ajanga state economy nem share tulutiba (63.57%) agütsür aser iba sülen Primary sector (24.81%) aser Secondary sector (11.61%) lir ta ashi. State indang per capita income (PCI) ajanga nüburtem living standard sayur aser ibai GSPD figures nungi agizükker aser Nagaland indang PCI ya sen 1,57,641 lir aser All India PCI ya sen 98,374 lir, ta ashi.

### Kohima nung business establishments register/renew asütsü metetdaksür

**Dimapur, Rongchii/April 10 (TYO):** Nagaland Shops & Establishments Act, 1986 indang Section 36 kübok Sub-Section (1) (2) aser (3) nung shia aliba ama, iba Act küboki maitba dak alaka Shops, Commercial Establishments kibur aser employers ajung dang May 10, 2024 tashinung Assistant Labour Commissioner's Office, Kohima District below New

Secretariat Complex nung pei Establishments register/renew asütsü metetdaksür, ta Assistant Labour Commissioner, Kohima ajanga sangdong ka nung metetdaksü. May 10, 2024 sülen Registration Certificate tejangja makai business inyaksangshiba metetra Nagaland Shops & Establishments Act, 1986 indang Section 36 kübok Sub-Section (1) (2) aser (3) nung

shia aliba ama pa/la-i registration mesüra renewal indang sen den sako senchi menoktsü aser iba den anogoshi senpak ana-na agütsü, ta sangdong ajanga ashi. Certificate mesüra renewal certificate ya Act indang Section 36 kübok Sub-Section 5 nung shia aliba ama establishment nung ajaki angutsü tesem nung teti atema ayutsüla, ta sangdong ajangasa ashi.

### Mkg nung SVEEP Inter-College Debate Competition ali

**Dimapur, Rongchii/April 10 (TYO):** Deputy Commissioner & District Election Officer, Mokokchung ajanga April 10, 2024 nü Town Hall Mokokchung nung ayongzüka SVEEP Inter-College Debate Competition nung ADC Mokokchung, Chumlamo Humtsoe-i tarurtem pela agizükba o jembidang, lanurtem nung election inyakyim shidak angatetdaksütsü aser lanur asüadang awareness agütsütsü nükjidong nung iba tetoktepba ya ayongzüka ta ashi. Iba debate competition nung People's College, Fazl Ali College, Mokokchung College

of Teacher's Education, Shisalen Riju aser Jubilee Memorial College nungi shilem agia liasü. Fazl Ali College nungi Asensor nem best speaker sempet agütsü aser Jubilee Memorial College nungi runner-up team nung Yimyatetla Sanglir aser Medemren Longchar na liasü. Iba tetoktepba nung tematiba jenjang anguba team nungya Shisalen Riju nungi Sungdienla L. Ozukum aser Nungsanglila Jamir liasü. Kasa sentong nung Assistant Commissioner Mokokchung, Ajit Kumar-i

voters awareness indang onük nung jembia aser nisung ajak dang pei vote agütsütsü temeden amshitsü ajungshi aser vote agütsüba ajanga loktiliba aser yimtenren melenshir, ta ashi. Election tiptema ochishia aser tesunep nung agitettsü sorkar ketdangsür mapa lir aser senso ajak teinyaktsüji pei vote agütsütsü lir, ta pai ashi. District SVEEP Icons, Supongsangla aser Arenlong nungeria nisung ajung dang vote agütsütsü ajungshi aser vote kajia tongtipang lir ta ashi. Alemyim Isaac Solo, EAC Mokokchung ajanga melepzüing o jembia iba sentong tembang.

### DC & DEO Chümoukedima ajanga Polling personnel dang metetdaksür

**Dimapur, Rongchii/April 10 (TYO):** Lok Sabha asoshi aruya aliba General Elections dak sendakba nung Deputy Commissioner & District Election Officer, Chümoukedima, Abhinav Shivam, IAS ajanga sangdong ka nung ashiba agi, Chümoukedima district kübok Polling Personnel ajak asoshi

mangatetjem alibatem angatetjemtsü asoshi tsünglanglen shia aliba ama Deputy Commissioner's Office, Chümoukedima indang Conference Hall (3rd floor) nung sessions agütsü. Anungji shirnokisa mangatetjem alibatem angatetjemnür, parnoki iba sessions nung adentsüla, ta ashi.

April 12, 2024 (10:00 AM to 4:00 PM)

Name of DLMT	Contact No.
1. Sentitsungla	- 8837217249
2. Dr. Chubalemla	- 9612083708
3. Sentimenla	- 9856420811
4. Dr. Peteneino Angami	- 9402489534 / 8787612539
5. Kedosakho Chucha	- 8119888291

April 16, 2024 (10:00 AM to 4:00 PM)

1. Kekhriekhou Dzuvichu	- 9856844616
2. Vidituonuo Kire.	- 9862776716
3. Kelivino Kirha	- 9436643628
4. Hainenio Magh	- 9556584534

April 17, 2024 (10:00 AM to 4:00 PM)

1. Aroko Nagi	- 9856512548
2. Watiyanger	- 8575207444
3. Imnasangba.	- 7005255465
4. Er. Imlitongzuk Jamir	- 9966091734

### DC & DEO Longleng ajanga metetdaksür

**Dimapur, Rongchii/April 10 (TYO):** AVPD, AVSC, AVCO & AVES indang category nung aliba Absentee Voters temi Postal Ballot ajanga vote agütsütsü asoshi Office of the Chief Electoral Office, Nagaland, Kohima ajanga metetdaksüba ama, AVES (Essential Service) category nung Absentee Voters temi vote agütsüba ya April 15-17, 2024 anogotem anepdang 9:00 ako nungi nikongdang 5:00 ako tashi Postal Voting Centre (PVC), Conference Room, DC

Office Longleng nung agütsütettsü, ta Deputy Commissioner & District Election Officer, Longleng ajanga sangdong ka nung ashi. Anungji Absentee Voters (AVES) shirnok indang Form 12 D verify süa confirm süogo, parnok arua shia aliba tesem, anogo aser mapang nung pei vote agütsütettsü, ta metetdaksü. Absentee Voters Category- AVSC, AVPD & AVCO nungi Form 12 D atema office dangi application kata maru, ta sangdong ajangasa ashi.

### Mon nung polling personnel 2nd Phase training agi

**Dimapur, Rongchii/April 10 (TYO):** Aruya aliba Lok Sabha asoshi Mon district kübok Polling personnel tem asoshi 2nd Phase training Government Higher Secondary School, Mon nung April 9, 2024 nü agia liasü. Training agirtem den Deputy Commissioner Mon, Ajit Kumar Verma IAS ajanga

jembidang, ADC Headquarter-i anir Polling Personnel Management Cell dang pelaba lemsatepa liasü. Election takok ngua agitettsü ya polling personnel dak keta lir, anungji training agirtemi ECI ajanga tuyuba ama training nung temulung agüja dener maparen shidak inyaktsüla, ta paisa ayongzüka liasü.

### Wokha nungi study tour cum exposure trip ka ayongzüka

**Dimapur, Rongchii/April 10 (TYO):** BBBP kübok Wokha jila nung aliba tetsür kaketshirtem asoshi anogo ka study tour cum exposure trip Bodhbarnü Kohima-i ao. Iba sentong ya Wokha District Administration aser District SANKALP Hub for Empowerment of Women, Wokha ajanga ayongzüka liasü. Deputy Commissioner, Wokha indang Conference Hall nung sentong tatsüka agidang, BBBP scheme ajanga iba tour sentong ya takok ngua ayongzükteter, koba tetsür chanu dak rangloker lir, ta DWO Wokha, James Ezung-i ashi. Pai kaketshirtem dang yimya tasen angazüktsü asoshi iba exposure trip ya maongka ka trip nung angazükba lesson tem

amshitsü aser mangdang tulu yur meranga azüngtsü ajungshia liasü. Sr. SDEO, Wokha, Minthunglo Ngullie-i kaketshirtem den jembidang, empowerment, resilience aser tashi indang milen abentsü ayongzüka aser iba tour ajanga pei sempet aser tashi tali jangja metettsü aser tetsür chanutem takum nung ajungmesotsü aser temelenshi bener arutsütsü imla atar, ta lai ashi. Iba study tour cum exposure trip nung Wokha district kübok school 17 (GHSS pungo aser private school 12) nungi tetsür kaketshir 23-i shilem agia liasü. Iba mapang parnoki Nagaland GIS & Remote Sensing Centre, NIELIT aser State Hub for Empowerment of Women semdang.



April 10, 2024 nü Kathua district nung Lok Sabha election atema nüboyim sentong ka nung Uttar Pradesh Chief Minister Yogi Adityanath aser Union Minister of State/BJP candidate, Jitendra Singh na adenba noksa nung angur.

### Baba Ramdev-i tatok meshiba Supreme Court-i magizüker

**New Delhi, Rongchii/April 10 (Agencies):** Medical advertisement taila agütsüba ken o nung Bodhbarnüa Patanjali Ayurved tentetsang, Baba Ramdev Supreme Court matsüngdangi ao.

Anogo ka tejaklen Ramdev aser Acharya Balkrishna nati affidavit ka ajanga Supreme Court dang tatok meshia liasü, saka Bodhbarnü Supreme Court-i, tatok meshibaji shidi nung ang lir, ta ashi.

Patanjali-i tatok meshia agütsüba affidavit tanabuba-a magizüki Supreme Court-i Patanjali Managing Director, Acharya Balkrishna aser co-founder Ramdev na dang court mezüngmeshiba ken o nung temerenshi atema renema liang, ta metetdaksü.

Supreme Court-i, "Onoki ibaji (tatok meshiba) magizüker. Iba ya metetsümonga tashi

mangaba lir ta onoki züngshir," ta metetdaksü.

Supreme Court-isa, "Court tetuyuba tashi mangaba atema nüburtem nem-a tansütsü osang metetdaksütsüla," ta ashi.

"Patanjali-i, parnok indang advertisements ji nüburtem Ayurvedic mozütem den sendaktepdaksütsü atema lir, ta ashir; alima nung parnoki mezüng Ayurvedic mozütem yanglutet ama parnoki inyaker," ta Court-i ashi.

Supreme Court-isa, "Supreme Court-i tuyuba dang masü saka iba linük tesem balala nung aliba court ajaki tuyubaji akhümtsübutsüla. Iba ya metetsümonga tashi mangaba lir," ya Justices- Hima Kohli aser Ahsanuddin Amanullah nati akümba bench-i metetdaksü.

Supreme Court-i hopta ka tsüngda affidavit file asütsü atema Ramdev aser Patanjali

MD Acharya Balkrishna na nem tatembangbuba maongka agütsüogo.

Bodhbarnüsa Supreme Court-i Patanjali-i taila advertisement agütsüyonga Uttarakhand state sorkari Patanjali anema meinyakba atema sorkar arrtsüogo.

Justice Kohli-i Uttarakhand sorkar dang, "Court mezüngmeshirtem den nenok tesendaktep mali, ta kechiba onoki mebilemtsüla? Nenoki metetsümonga mangu ama yutsür," ta ashi.

Ibaji langzüa Uttarakhand Food & Drug Administration Joint Director, Dr Mithilesh Kumar-i teka amteper court dang tatok meshi.

Dr Kumar-i, "Yimlibilema kü dang tai tokang. Ni June 2023 nung ang aru aser item tatalokba ya ni malidang atalokba lir," ta ashi.

### Chhattisgarh kübok Durg nung gari lendong nung nisung 15 asü

**New Delhi, April 10 (Agencies):** Mongolbar aonung Chhattisgarh state kübok Durg district nung nija distillery company ka nung inyakerem mapa tembangba sülen bus ka nung kidangi aoba mapang gariji tsükok nisung 15 asü aser aika yiru.

Bus nungji 'headlights' maliba agi lenmang junga mengui tsükoka lisem atuba ongken kati süklep 40 shi ai. Bus nungji nisung 40 shi liasü.

Durg Superintendent of Police, Jitendra Shukla-i, Mongolbar aonung 8:30 ako

meta Khapri yim anasa iba lendongji atalok; lendong atalokba tesem nungjisa nisung 11 asü aser nisung pezübo hospital-i anir aoba sülen asü, ta metetdaksü.

City Superintendent of Police (Chhavni area), Harish Patil-i, iba lendong osang angashiba sülen rescue team ka iba tesem jagi oa yirua alirtemji anasa aliba hospital kati anir ao, ta metetdaksü.

Ato kilonser Narendra Modi aser Chhattisgarh Chief Minister Vishnu Deo Sai nati mangyim jashi lemsatepba den

külemi yirua alirtem tajungtiba nung yaritsü tuyuogo, ta metetdaksü.

Ato kilonser Modi-i X ajanga, "Durg, Chhattisgarh nung bus lendong atalokba osang angashia jashir. Iba lendong nung asürtem kibong züngsemtem den mangyim jashi lemsateper. Iba denji külemi yirua alirtem tekaraba nung aneptsü atema ni sarasademtsür. State sorkar ketdangsüba kübok local administration-i takoksa angurtem den akokba tashi yaritepdar," ta metetdaksü.



April 10, 2024 nü Srinagar nung National Conference Tir, Farooq Abdullah aser par jabaso, Omar Abdullah na 'Eid-al-Fitr' benjung nung adenba noksa nung angur.

### BJP-i Lok Sabha election atema Candidate list 10buba sangdong

**New Delhi, April 10 (Agencies):** Taruba Lok Sabha election atema Bodhbarnü Bharatiya Janata Party (BJP)-i candidates list 10buba sangdongogo.

Bodhbarnü sangdongba list nungji Rajya Sabha MP, Neeraj Shekhar-a densema lir. Pai Uttar Pradesh kübok Ballia constituency nungi tokteptsü.

Neeraj Shekhar ya tamalen Ato kilonser, asür Chandra Shekhar nungi jakzüka lir. Pa Samajwadi Party nung densema aliba mapang nung pai 2007 küm nungi 2014 küm tashi kasa constituency nungi toktepa liasü.

2014 küm Lok Sabha election nung pai BJP candidate ka matsüngdang tamakok angu. Iba sülen pa Rajya Sabha MP shima liasü.

2019 küm Lok Sabha election nung SP-i Shekhar meshim, ibayongji pai SP toktsür BJP nung aden aser Rajya Sabha MP shima liasü.

BJP-isa Ghazipur Lok

Sabha menden atema Paras Nath Rai shimogo. Pai Samajwadi Party aser Congress na teloktep candidate, Afzal Ansari den tokteptsü.

Bodhbarnü sangdongba BJP candidates rongnung nisung 8 bo tang mezüngpurtem lir. West Bengal kübok Asansol Lok Sabha menden atema BJP MP, SS Ahluwalia melen Bhojpuri celebrity Pawan Singh shimogo.

BJP-isa Chandigarh menden atema Sanjay Tandon, Mainpuri menden atema Jaiveer Singh Thakur aser Machhlishahr menden atema B.P. Saroj shimogo.

Vinod Sonkar-i Kaushambi menden nungi tokteptsü, Praveen Patel-i Phulpur menden aser Neeraj Tripathi-i Prayagraj menden nungi tokteptsü.

2019 Lok Sabha election nung BJP-i menden 303 nung takok ngua liasü aser Indian National Congress (INC)-i menden 52 dang nguteta liasü.

### LS election atema Samajwadi Party-i manifesto saya



April 10, 2024 nü Lucknow nung Samajwadi Party Tir, Akhilesh Yadav-i Lok Sabha election atema party manifesto sayatsü dang tangokba noksa nung angur.

**Lucknow, Rongchii/April 10 (Agencies):** Bodhbarnü Samajwadi Party (SP)-i taruba Lok Sabha election atema manifesto 'Janta Ka Maang Patr, Humara Adhikar' (Nüburtem takhangbatem-onok temedentem) sayaogo.

Party manifesto nükjidongji tashi maitertem ajungkettsütsü atema lir, ta parnoki metetdaksü.

SP manifesto nung tongti onüktemji- linük temzüng nung temedentem; Loktiliba & Rongsenketzüng temedentem; Aluyimertem jenjang ajungtsü; Lanurtem aser mapa; Health aser shisaliok; Tetsürtem nem tashi aser Industry den Commerce lir.

SP-i nüburtem nem jang masü saka wheat agütsütsü aser ration card alir kibong ajak nem sen 500 jenjang internet data agütsütsü nangzük.

SP-isa linük temzüng kübok temeden balala aser democracy kümzüksü, press aser democratic rejutem nem temeden agütsütsü nangzük.

SP-i aluyimertem nem mamatzü aser alu nungi züsentepta ajak nung MSP

agütsütsü nangzükba den külemi aluyimertem sentsüh asadangtsü aser maneni teyari agütsütsü atema Farmers' Commission tentetsü, ta nangzük.

Manifesto nungsa jila/yimitem nunga mapa agütsütsü atema MNREGA scheme mesükba mapatong tasen ka tenzüksü nangzükba lir.

SP-isa health atema GDP nungi shilem 3.5 tali lezmüksütsü nangzük. Tang GDP nungi shilem 2.5 shi dang health atema lezmükja lir.

Below the poverty line (BPL) kübok tetsürtem nem ita shia pension sen meyrjang asemsem (3,000) agütsütsü, para-military sepaitem aser tangartem nem Old Pension Scheme agütsütsü aser shishilembarthem atema GST inyakyim repringshitsütsü parnoki nangzük.

Samajwadi Party-isa 2025 küm tashi nungbo caste census agitsü aser kasa küm nungjisa Scheduled Castes, Scheduled Tribes aser other backward classes atema lezmükja aliba sorkar mapa tazüng ajak asoshi nisung shimoktsü nangzük.



# TIR YIMYIM

## YIMOBILEM (EDITORIAL)

DIMAPUR

YANGTEPNÜ

RONGCHII 11, 2024

### Sarasademsüa memelar!

**D**imapur nungbo yakanüang Aor reverend-tem adenshir arua aliba parliamentary election junga agitetsü asoshi tongtibang tesem ana, Deputy Commissioner aser Commisisoner of Police office kima sarasadem mapang tajung ka ayongzüka agiogo. Iba sarasademji ajanga Tsüngremi nisung mulungjang nung shitak aser tajung inyaksü asoshi tangatetba agütsütsü imlar. Sarasadema yabo Khristantemi dang masü saka alima nung tamangba yimsü tapu balala shia dak amangertem ajaki pei pei tsüngrem dang sarasadem. Ibaji tanü asenoki asen lima nunga angur aser asenok Laishiba nunga Yona tapu nung rong nung mena alirtemi tzüim yipru lendong nungi kümzüksü asoshi pei pei tsüngrem dang sarasadema asenoki azünger. Aji oda, asenok taküm madak kibur Tsüngrem ka lir ta amangertem asoshi teti Tsüngrem den jembia alitsüba ya kanga tenügdaksü, kechiyong asenok nungdak aser asenoki aginüba ajak Tsüngrem ket nung dang lir, anungji itemji meshia asüngdangtsüla. Ibaji sarasadem. Iba tangatetba nung Tsüngrem dang election mapang yimjung aser tangatetba shisatsü meshia Aor reverend-temi sarasademogo. Iba sarasadem agitsübaji shingaia menokdang aser iba sentong ayongertem dak shingaia mulung malemba mali asü. Ajisüaka, asenok Nagaland among adena orr India lenbo asen lima nung tarendak aser tetsübu kecha melii sarasadem sentong ayongzüka agiba ama magiteter. Asenokbo asen lima nung tenla kidangi kecha tarendak aser tetsübu melii ayongayonga aser sademsadema orr arur saka asen lima among adena orrbo sentepi aotsübaji tetsübuttsüka, taküm agi tendanga orr arutsüba dang, kechiyong sentep telidak nung kechi ataloktsüar memetetba tia nung sentep sentong tenzüker. Aji oda, asen lima nungbo yimti nung yimten ketdangser tulutiba ana, Deputy Commissioner aser Commissioner of Police na prongla office kima sademsadema parnoka lia sarasadem mapang agitetbaji tesüngmangtsü Tsüngremer taochi mapang ka lir. Item mapang tajungtem den tangalen Assam nungi tenzüka India tesem balala nung Khristan purtembo sarasadem sentepa melidaksüi nokdangba angur. Item rongnung tang yashi yakanü ka Madhya Pradesh state nung Indore yimti nung sayutsünger Dr.Paul Dhinakaran-i anir lokti sarasadem sentong ka alitsü sentong ajak renemer lia Hindu yimsü dak amangertem kari anema apusoba ajanga sarasadem sentongji melitetsüsa akümba osang asenoki angashir. Atangji, itemji Khristan-tem asoshi tasen masü aser meimlaba mapa kata masü. Itemji Tenyartem mapang nungi ataloka arur aser Yisui shina yutsübatem ataloker asütsü. Aji oda, Nagaland gate adener Assam nunga Yisu Khrista tenüng nung taneptsü meshia sarasadembaji ozüng raksaba mapa ka kümdaksüogo. Tesüngmangtsü kaji, Khristan yimsü anema ozüng yanglur yimsüsürtemji teimbaka Khristan school nung azüngba purtem asütsü. Ajisüaka, parnokji Khristan purtem nungi teyari ngua tashitemeteter akümba dang ashi, parnokji Khristan maküm aser shingaia kangshia Yisu dak amangtsübo mashitsü. Iba jagi Khristan purtemi mamangba purtem mesüzüka Khristan kümdaksür ta aitsübaji taia ta kuli angur. Atangji, Khristan purtemi temeim mapa inyaker, kechiyong Khristan purtem Tsüngremji temeim lir. Anungji, temeim mapa meinyakba aser temeim maliba nisungjibo Khristan masütsü. Ibaji kodang bilemdangdir, temeim mapa inyakeritem aitsüba aser temeim mapa inyaksü nokdangba purtemji parnok kübok alir shinga tajung aser nüchi mekümdaksünüba purtem asütsü. Aji oda, mamangba purtem yimsü nungbo ki aoker kinji teti ki aoktsü, sü ashir kinji teti sü ashitsü aser janaona bendena endokertemjia teti iba mapaji dang inyaksü ta alarji teti alar aser kiburji tatem maka kibur asütsüsa lateta lir. Iba jagi nüchiso maginer aser magütsüner südi.



# OLEMSABANG

OFFICE OF THE

## LANGPANGKONG KAKETSHIR MUNGDANG

*Langpangkong Students' Conference*

H.Q. Chuchuyimlang – 798614. Dist. Mokokchung : Nagaland

Email : [Langpangkongkaketshirmungdang@gmail.com](mailto:Langpangkongkaketshirmungdang@gmail.com)

### "Clean Election" Olong Aqi Laktetba Nüburtem

Arogo nung Tanishir Metsür Tuko-i (29 Church Leaders) Election dak sendakba koba Ochi mashi inyakyim lir iba anema aser Naga nunger nem angatetdaksütsü asoshi Telemtetba tajung agia **"Free and Fair Election"** sangdongtsü nangzük. Anungji Parnok Lenisüba kübok, 15th March 1973, Nagaland Baptist Churches Council (NBCC) ajanga iba asoshi Jembitsü tenzük. Iba misem jangruba ajanga, Küm Lir (40 years) sülen , 2013 küm nungang Naga nunger Arogo, Yimden, Lokti balala-iba **"Clean Election"** sangdong-a mapa küma inyaksü tenzük. Aser iba tongpang ya tanü tashi asenok ajaki meranga raraa arudar.

Tanü asen tensa repringdangra, aikati iba Olong "Clean Election" ta asüba ya lakatokogo aser mejempiner. Karibo "Clean Election" ta masü saka **"Clean Voters"** mesüra "Clean Candidate" mesüra "Fair Election" mesüra "Clean System Election" ta melentsüla ta ashir. Item Olong ajakji kanga tajung aser tongtipang lir, saka iba olong ji melenba jagi ochimashi inyakba ji memelenshitsü ta bilemer.

Aikati iba **"Clean Election"** tongpang ya tamakoktsü ama bilemer aser aika asoshi teimla samaogo. **"Clean Election"** asoshi jembidang nüburtem-i jashia bilemer, kechiaser item jempir nübur aser tanishir aikati metetta aser memetetti aibenlen jenti inyakba ajanga temolung melemtetti kümogo. Saka alima nung, teraksar jenti liaka, teyanglur ishika dang süaka, iba nung Tsüngrem tena lira künübo iba tongpang ya akoktsü. Alima nung nungtugo tanishirtem, shibai pei lima melenshidaksü, item ya aonung mejanger sakdang melenshir sakba masü, saka teimla aser nükjidong mesamai jajaba agi takok anguba lir.

Martin Luther King, Jr. (*American Christian minister, activist, and political philosopher*) **pai equality and human rights for African Americans** asoshi nokdak. Küm terka (11 Years) 1957 -1968 (Pa asüba Küm tashi) iba tsüngda, Pai miles Million trok(6 Millions) jaja aser koba nung ochimashiba, anemba aser tashiyim-i inyakba nung pai Merijang ana aser pungo (2,500) ben tasü ita jembia. Anungji, Civil Rights Act 1964 aser Voting Rights Act 1965 aser Fair Housing Act 1968 nung agizüka Martin Luther King Jr- i iba Civil Rights Movement takok tulu angu. Pai pa Tekolok nung Olong ka bener jaja ibaji "Equality and Justice"

Martin Luther King Jr-i ashiba ji, "Nai Meyimtetra asemang, nai masemtetra jajaang, nai mejajatetra apuang, saka nai kechi inyakdir, maneni tejakleni aotsüla ("If you can't fly then run, if you can't run then walk, if you can't walk then crawl, but whatever you do you have to keep moving forward"). Anungji, asenok Naga nunger, talisa Aoertemi "Clean Election" asoshi tatemtsü (excuse) kecha malitsüla.

Asenoki kodang laishiba Anitet kaket nung Mosa otsü repringdir, pa taküm kümzüksü mechi nung pai Chupa ki nungi adok aser pa kicha san tem nüka alidang Tsüngremi, pa den ola adoka jempi, aser Israel nüburtem Egypt nungi anitetsü nungloktsü. Tamasabo pai tatemtsü (excuse) aika agütsü : Pa tashi mait indang ashi, Pai Jembitsü, inyaksü nung tamang makatet liasü. Saka kodang Tsüngremi Mosa yaritsü aser sayatenya nung anitsü ta ashi, Mosa-i tatemtsü (excuses) ajak sepzüka yutsür Tsüngrem-er nükjidong atalokdaksütsü ao. Aser Tsüngremi Tenangzükba lima ka sayu aser iba ji "CANAAAN" (The land flowing with milk and honey). Iba nükjidong aser Olong ji yur Pai anitsü tenzük. Küm 40 tashi ani, tesasatsüka Mosa-iba "CANAAAN" lima ji metongtet saka Yihusua aser Kaleb den külemi Chirnurtem, semchir aser tanüngba nübur temi-bo küm Lir (40 Years) sülen tongtet. Küm lir(40 Years) süaka tanishirtemi aser tanitakertemi teimla mesamai, jajaba yong parnoki tongtet. Hau! Israel nüburtemi nemnema anidak ogo, saka parnok nükjidong ka liasü aser aji "CANAAAN" Tsüngremi nangzükba lima, "Mamatsü aser muhchitsü ayimba lima"

Tanü asenok Naga nunger Nükjidong ka lir, aser iba ji "Clean Election" aser ibaji Koma sür akoktsü aser adaloktsü ? Asenoki Tanela, Shisatsü aser temolungjang taroktiba agi agizükteter asü magizükteter? Asenoki Sen agi vote ayokba/aliba ya shidak asü meshidak ta bilemer? Shidakba temolungjang agi iba temeleshi ya aginer asü ? Nai melonga (willing) alia mali ?

Barbara Jordan, shiba American lawyer, educator, university professor aser politician liasü, lai ashiba ji "Lokdi ajungtsü asoshi nisung shia-i khuret bena **molungtetba** (Willingness) ajanga linük (Nation) ka yanglutetter"

Anungji, ajak ji Temolungtetba(willingness) agi tenzüker süra, nai "Clean Election" asütsü ji molunger asü? Asü na odang iba teraksa jagi yimya ka kümer shilem maginer ? Asüng tarutsü nung Lanurtem,

Chirnurtem aser Semchirtem tarutsü putu ji jungdaksünera , tan? Na aser Ni nungi temeleshji ji tenzüksüla, molungtettsüla, Teimla mesamatsüla, ochi nung Nokdaksüla aser iba " Clean Election" Olong aser pa dak sendakba Nükjidong koba lir, iba jagi malaktsüla.

By :

**Arenkaba Jamir (Kangtsüng)**  
Associate Pastor Youth, KBA

Tayonger (Initiator):

**Langpangkong Kaketshir Mungdang (LKM)**

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# North Gaza nung ayawara ajanga Khristanem ratamadar



Yaküm November ita nung Gaza City nung aliba St. Porphyrius Orthodox Church kima Khristanem asüpila sentong ka agidang tangokba noksa nung angur.

**April 10, 2024:** Gaza nung Israel aser Hamas na tsüingda rara tenzükba sülen ita trokbuba nung ayaokdang Gaza nung atangji ayawara tenzükogo.

Ayawara tenzükba sülen Gaza nung Khristanemi maneni Gaza nungsa alitsü asü Gaza toktsür aotsüar kanga ratamatadar, ta International Christian Concern (ICC)-i metetdaksü.

Rara ajanga tang tashi nung Gaza nung nisung 33,000 dak tema süogo, nisung 70,000 dak tema yiruogo aser nisung meyrjang aika samaogo.

Tawa international teloktemi northern Gaza Strip nung ayawara tenzükba sangdong. Gaza nung chiyungtsü peria machiba agi tanur aser tetsütem aika asüba osang jangjaogo.

Gaza nung tetsür-tanur densema nisung meyrjang aikati chiyungtsü, tzü temerük

aser mozü kanga nüngdaker.

Gaza Strip nung Khristan 500 shi Gaza City nung aliba Tenla ki ana nung jenoka lir. Putir ka den sister temi Khristanemji anepalua reprangdar, ajisüaka ayawara tensa ya tamajungba kümra parnok aika süadoktsüa akok.

Gaza nung Khristan karibo Gaza toktsür Rafah border crossing ajanga Egypt-i oa jenokogo. Gaza nung Khristanemi pei lima, pei ki, pei Arogo aser kinüngerter toktsür tanga linük nung jenoka meliner, ajisüaka ayawara tensa tamajungba kümra parnoki pei lima toktsür aotsüsa akümtsü.

"Tang iba ama tensa ka nung Gaza nung Khristanemi telemtetba tajung agitettsü atema parnok nem shisatsü agüjang ta sarasademjang. Gaza nung Khristanem aser yangji aliba nübur ajak kümzüka

alitsü atema sarasademjang. Iba rara anentsü atema sarasademjang," ta International Christian Concern-isa mepishia metetdaksü.

Ano külen tanga osang ka ajanga ashiba agi, Gaza nung Khristanemi pei kinüngerter tasü mang Khristan leperi bener oa aremtsü atema tsübur, kechiyong Khristanem leperi aodang lendong ajurutsü akok. Ibayongji Khristanemi tang mezü ng Muslim nung leperter nung Khristanem tasü mang aremer.

Muslim nung leper 'Tal al-Sultan cemetery' nung inyaker kati, "Ni iba leper nung tesüiba küm ter jungnüa inyaker. Muslim nung leper nung Khristan tasü mang aremba ni kodanga mengudang. Ajisüaka rara aliba agi onoki Khristanem tasü mang yangi remdaksür," ta metetdaksü.

# Khristan lenir kati secular lenirtem nem vote agüjang ta ayongzüük

**April 10, 2024:** India nung Lok Sabha election agitsü joko mapang ana nung lia Bangalore nung tongti putir, Peter Machado-i Catholic Khristanem dang linük nung secular sorkar ka atema vote agüjang, ta ayongzüük.

Peter Machado-i, "Secular lenir ka, telemsa madokdaksür, linük temzüng kübok inyaker aser ochishir lenirtem shimtetang," ta ayongzüük.

Paisa, secular tetezüü tebandang kecha makai nisung ajak akhümtsübur ka, aser telemsa madokdaksür tetezüü tamangba yimsü ajak agizüker ka, ta ashi.

April 07, 2024 nü Bengaluru nung aliba Logos Retreat Center nung sentong ka nung jembidang Peter Machado-i, Catholic Khristanem ajaki pei vote agütsüsüla, kechiyong taruba election ya ajak atema kanga tongtibang asütsü, ta ashi.

"Vote magütsüra ibaji temenen. Khristanem reshikangshiba aser Arogo rejutem anema inyakba kanga bulua akümba atema kidang dang mener nemnembaji amajok asütsü," ta shia pai vote agütsüsü atema Khristanem ajungshi.

Peter Machado ya Karnataka Regional Catholic Bishop's Council nunga Tir inyaker.

Machado-i, "Vote agütsüsü temsüa alir ajaki vote agütsüba anogo nungjibo tanga sentong ajak thinener vote agütsüsüla," ta ayongzüük.

April 19 nungi tenzüka shilem tenet lemsar Lok Sabha election agitsü. Karnataka state nunga shilem ana- April 26 aser May 7 anogotem nung election agitsü.

Karnataka Regional Catholic Bishop's Council nung otongdar, putir Faustine Lucas Lobo-ia, tongti putir Peter Machado-i ajungshiba

oji ajanga tim candidates shimba nung nüburtem yaritsü, ta metetdaksü.

April 10 nü osangbener den jembidang Faustine Lobo-i, "Tongti putir Machado-i shidak jembiogo, kechiyong linük nung minorities atema tensa tamajungba dang akümer. Tesüiba küm 10 tsüingda reshikangshi tamajungba kümogo," ta ashi.

Paisa, India linük temzüng ajanga senso ajak nem kasa temeden agütsür aser pei melungba yimsü amanga beshitsü atema senso ajak nem temeden agüja lir, ta ashi.

February ita nung India nung Catholic putirtemi March 22 nü Khristanem dang taruba elecion atema lumia sarasademtsü ayongzüka liasü.

Karnataka state nung nütsü ng million 68.4 dak tema lir, ajisüaka iba nungjagi nütsü ng shilem 1.87 dang Khristanem lir.

# ANO GO ABEN TSÜNGREM DEN

## Tanela anir arurtem

"Aniseta alir dang o agi ... koda jembitsü ... temeli agüja lir." (Isa. 50: 4a)

Khristan mapa nung tesademtiba mapa wadangji tanela anir aruba mapa ya lir. Koba Khristani aji inyaksü makoker, koba meta tesütep masür, aser kechi mapang mesademer?

Kar tanela anir arutettsü asoshi asenok dangi tangarji mela mela arutetba asütsüla. Tanela anir arur ka menürem tejak adentsüla. Pai osang tajung bener aor masü na? Tanelatem asoshi khuret akabaji pai tejak mekümer mesayutsüla, saka anemsü masütsüla. "Onük tajung ka agi kü mulungjang moshia lir. Chuba atema ni kechi ken mejemer; Kü temeli kara kara-a zülur kolema ama lir" (T. Ken 45:1). Ibai tanela anir aruba noksa ka lir.

Tanela anir aruba mapaji azünga alidang inyakba mapa ka masü. Ibai mapang ajak nung kuli asütsüba mapa ka lir (2 Tim 4:2). Aluyimer ama tanela anir arurtemi metsü proker aluruwa asoshi aremzüka atatsüla (Yakob 5:7). Tanela anir arur nisung kaji ango purtem ama zütsük tzü nung ondaksür aremzüka atatsüla. Taremzuk aser tenendakji tanela anir arur jakla asütsüla. Merangdangba aika nung takok mangutsüa akok, saka mejashitsula. Arogo nung Sannükeri sentepi arurtem dang masü, marur aser samaba santemji kümdanga bushitsüla. Pai aritepa medoktsütsüla. Nisung tsüingdang kechi tamakoktsü aji Tsüngrem tsüingdangbo takoktsü lir.

# Florida nung aliba Westview Baptist Arogo nung pastor tepset

**April 10, 2024:** Florida nung tebur kati Baptist Arogo ka nung pastor ka kotari agi kidang jenoka alitsü atema pastor-i temelaba agüja liasü.

Arrshi küm 41, Antwane Lenoir ya tesüiba küm 15 tashi Florida kübok Miami nung aliba Westview Baptist Church nung pastor inyaka liasü.

Hombarnü (April 8) Miami-Dade Fire Rescue nungi ketdangsertemi pastor Lenoir tasü mangji angu. Pa tekong nungji yiruba zübo aika liasü.

Pastor tepsetba anogo nungji pastor-i Tenla ki indang kishi dala aika yanglushitsü atema insang mapa inyaker ka jaa liasü. Iba mapang nungji pastor Lenoir aser pa tepsetsang, James Dawkins na tsüingda mangatettep adok.

Tenla kidang khenpiga atema jenoka alitsü asoshi pastor-i arrshi küm 44, Dawkins nem temelaba agüja liasü. Tena tsüingda mangatettep adokba sülen i pastor Nick Davi khaseta Dawkins-i pastor dak kotari liasü.

agi aiben atsüingba sülen jena oadok. Tasü ngnü ketdangsertemi Dawkins apu aser pa anema ken o benokogo. Pastor aser pa kinüngtsü, Bree na tanur pezü sosema lir aser chnrurtemji arrshi küm 13 nungi 20 tsüingdapurtem lir. Bree-i, "Pa ya pei atema mebilemba nisung ka liasü aser mapang ajak nung pelaa dang aliba nisung ka liasü. Mapang tamajungdanga pai menürema dang ali," ta ashi. "Takümüji tembangba mapang masü mesüra tenzükba mapang-a masü, ajisüaka pai pa taküm koma ali, ibaji tongtibangba," ta lai ashi. Taküm küm tetenzüklen Grace Point Church nunga zü ngsertemi Pastor Nick Davi asüba atema mangyima liasü. December ita nung kiyonger kati pastor Nick tepseta liasü. Iba tatalokba ken o dak sendakba nung par kiyonger Joe Junio apu. December 29 nü Joe Junio-mangatettep adokba sülen i pastor Nick Davi khaseta Dawkins-i pastor dak kotari liasü.

### AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

#### Sülok

- (v) ki ulushia yangluba ( house extension)
- \* Mungdang atema yimer kibong shia ki sülok.

#### Sülok

- (v) apuloka bener aoba (carry on shoulder)
- \* Tambur ka mejajateti aliba Watibai süloka ponger ao.

### OLONG PAITEP # 6753

1		2		3				4
						5		
6		7						
			8		9		10	
	11							
12								
				13				
			14			15		
16								
							17	

#### TIPIEN

- 1. Melemzük - (4)
- 5. Tebilemba oren züluba - (4)
- 6. Shirong mesük - (7)
- 10. T \_\_\_ k - (3)
- 11. Shisadang - (9)
- 12. Tera - (3)
- 14. Chi kenshiba - (7)
- 16. Saklok / Keta-asen - (4)
- 17. Telongpo o temokok tsüngda - (4)

#### LANGTSÜNGLEN

- 1. Aon nangdaksüba - (5)
- 2. Y \_\_\_ ng - (3)
- 3. Tekolok meshidak - (4)
- 4. Tekolak aser temang tsüngda - (6)
- 7. Mapa inyaksü atema ayuba - (5)
- 8. Tsük asepa oset - (3)
- 9. Nü den tambu - (3)
- 10. Anameta - (5)
- 11. Süngmanga reprang - (6)
- 13. Tarutsü indang ashi - (4)
- 15. Teka agi am - (3)

### OLONG PAITEP # 6752 TELANGZÜBA

#### TIPIEN:

- 2. Bangsemo, 6. Tiptem, 8. Jen, 9. Talilla, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.

#### LANGTSÜNGLEN:

- 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.

### NAI-A YA METETTER MA



US nung arishi küm 58 tain Donna Jean Wilde-i mapang talangtiba 'abdominal plank position' atema Guinness World Record ngutetogo. DonnaJean Wilde-i 'abdominal plank position' nung ghonda 4 ser minute 30 tashi liasü. DonnaJean-i taoba mapang vice principal inyakba high school nung lai iba otsu yanglutet. Lar tanur pungu aser semchir 12 lir.

### Kuki-Zo yimdaklirtemi BSF agienba anema lungkak aiter



Imphal, April 10, 2024

(Agencies): Lok Sabha election jakdang Home Ministry-i Border Security Force (BSF) agientsü tetuyuba Kuki-Zo nungeri magizüker.

Kamjong district kübok Thawai Kuki yimdaklirtemi Bodbarnep 6:00 ako nungi yimdong nung lungkak aitiba sentong ka agiogo.

Ministry of Home Affairs-i Thawai Kuki yimtsüng nung mapa lemezüka aliba BSF sepaitem agientsü tetuyuba agütsüba anema parnoki lungkak ait.

Manipur nung yimjung maru tashi mesüra tanga security measures kar meinyak tashi onoki lungkak aittsü ta Hohoi Haokip-i ashi.

BSF sepaitem anienba ajanga yimtsüng lendongi aitsü. Sepaitem agienba ajanga tangari onok amaksü ta laisa ashi.

Yaküm August 18 nü prangpong amertemi ozü yimtsüng amak aser idangji tasütait lanur asem Thangkhekai Haokip (35), Jamkhogin Haokip (26) aser Boicha Baite (24) nunger tepset. Anungji onoki lungkak

aitiba atema kuli tejangja lir ta Hohoi Haokip-isa ashi.

BSF sepaitem agienra onoki Internally Displaced Persons ama relief camps nung jenoktsü ta laisa shisem.

Tengnoupal district kübok Pallel nunga Mongulbar nikongdang nungi yimdaklirtemi BSF sepaitem agientsü anema lungkak aiter.

Maneni, H. Kotlenphai aser Twisomjang yimdaklirtemia BSF sepaitem agientsüba sentong anema yimdong nung lungkak aiter aser gari lenmang mokdanga lir.

### Assam CM-i MCC anema inyaksangshiba atema ECI dangi aoer

Guwahati, April 10, 2024

(Agencies): Chief minister Himanta Biswa Sarma-i model cardholder indang bank account shia nung Rs 10,000 enoktsütsü ta nangzük.

Iba ya MCC anema lir aser iba tenangzükba ya voters anisatsü merangba lir aser election maparen nung tim masüba lir ta Assam Congress candidate Bordoloi-i ashi.

Election Commission of India (ECI)-i iba atema bushisüngdangtsüla aser Assam chief minister aser Northeast nung Bharatiya Janata Party (BJP) lennir dak ozüng kübok tapet mapa inyaksüla ta paisa ayongzükogo.

Assam Congress lennir Pradyut Bordoloi-isa Chief Electoral Officer (CEO) tsüngdang tanga ken o ka benok

Himanta Biswa Sarma-i election agiba sülen ration cardholder indang bank account shia nung Rs 10,000 enoktsütsü ta nangzük.

Iba ya MCC anema lir aser iba tenangzükba ya voters anisatsü merangba lir aser election maparen nung tim masüba lir ta Assam Congress candidate Bordoloi-i ashi.

Election Commission of India (ECI)-i iba atema bushisüngdangtsüla aser Assam chief minister aser Northeast nung Bharatiya Janata Party (BJP) lennir dak ozüng kübok tapet mapa inyaksüla ta paisa ayongzükogo.

Assam Congress lennir Pradyut Bordoloi-isa Chief Electoral Officer (CEO) tsüngdang tanga ken o ka benok

asir ibaji BJP-i socio-economic survey atema rongshiba lir.

"April 6, 2024 nü CEO-i iba atema show-cause notice ka agüja liaka sorkari socio-economic survey atema forms alemer aser 'Orunodoi' cash direct benefit transfer (DBT) scheme kübok tenüng zülüoktsü nangzük" ta Assam Congress MP Bordoloi-i ashi.

Iba ya election temzüngtem mezüngmeshiba aser hao ta maliba lir aser election nung tajangzük angutsü atema sorkar sentongtem amshiba lir ta paisa ashi.

Assam nung BJP sorkari MCC anema inyaksangshir ta CPI-M-i April 5 nü ken o ka benokba sülen Assam CEO office-i show-cause notice agütsü.

### Manipur kübok Ukhrol nung prangpong-injang shibelener ka apu

Imphal, April 10, 2024

(Agencies): Bodbarne Manipur kübok Ukhrol nung prangpong shibelener ka puogo aser pa ket nung Rs. 13.11 lakh, prangpongtem aser injangtem ngutetogo.

Ukhrol nung Tangkhul Naga nunger teimba ser alir aser Inspector General of Assam Rifles - South (IGAR-S) aser Manipur Police külem telok kati prangpong shibelener apu.

Osang tejangja ka angazükba sülen Ukhrol district police aser Assam Rifles telok kati Mongulbar ayaterm nung Viewland tesem mita ao.

Idangji Nganingmi Vashum (42) ta ser prangpong-injang shibelener ka apu aser pa ya Ukhrol District kübok New Tusom village nungi lir.



Pa ket nungi Rs. 13,11,130 (cash), 9mm Carbine with magazine, 9mm ball ammunition 37, Pistol with magazine, Chinese Hand grenade, 5.56 mm INSAS rounds 40, 0.22 Ball ammunition 15, AK-47 rounds, 7.62 SLR fired cartridges 3, Assault Rifles Sling 3, 12 Gauge

Shotgun 1, shotgun rounds 110, Shotgun fired cartridges 3, mobile phones 2 aser wallet ka ngutetogo.

Iba nisung ya Ukhrol Police ket nung agütsüogo aser pa anema Arms Act aser Explosive Substances Act 1908 kübok ken o benokogo.

## US-i Iran ket nungi apuba prangbong injang meyirejang aika Ukraine nem agütsü

**Washington, Rongchii/April 10 (Agencies):** United States-i prangbong meyirejang aika aser injang 500,000 dak tema Ukraine nem agütsüogo. Item pranbong injangtem ya küm ka tejakdang Iran-i Yemen nung Houthi telok dangi yoka aliba mapang apuba lir.

US military-i ashiba agi, prangbong injangtem ya April 4 nü agütsüogo, koba Russia-i Ukraine amak tenzükbä sülen US Tir Joe Biden-i aniba administration-i Kyiv nem teyari agüja aruba tesüsabuba asütsü.

Republican House Speaker Mike Johnson-i USD billion 60 alang Ukraine nem security teyari agütsütsü atema vote agütsü ayongzüksü memulungba ajanga US-i Kyiv nem prangbong hadir talila agütsütsü asoshi Democrat Biden nem tenokdangba agütsür lir.

Ukraine nunger sepaitem prangbong aser injang aser talisa artillery injangtem agi kanga anünga aliba mapang Washington aser parnok den sendaktepa aliba linüktemi Kyiv nem teyari agütsütsü atema lenmang balala bushia arudar.

Social media sabang X ajanga, US Central Command (CENTCOM)-i, prangbong hadirtem rongnung AK-47 assault rifles, machine gun, sniper rifle 5,000 dak tema aser 7.62 ammunition round 500,000 dak tema densema lir ta metetdaksü.

Item prangbong injangtem ya US navy aser parnok den sendaktepa aliba sepaitemi linük tejangja maliba rong pezü nungi 2022 küm May 22 nü nungi 2023 küm February 15 nü tsünga pua liasü, ta CENTCOM-isa metetdaksü.

"Ukraine indang brigade ka atema item prangbong injangtem ya teperi asütsü," ta kasa sangdong ajanga metetdaksü. Infantry brigade ka nung yimya agi sepai 3,500 nungi 4,000 tsünga alir.

United Nations dangi Iran indang permanent mission-i ashiba agi, "onok meyong masüba prangbong injangtem dak sendakba nung onoki kecha telangzüba magütsütetsü."

Item prangbong injangtem ya Iran indang Islamic Revolutionary Guard Corps-i Yemen nung Houthi telok dangi yokba lir, ta CENTCOM-isa shisem.

Administration ketdangsurtemi ashiba agi, US-i military teyari agütsütsü atema sentong yanglur aliba takok mongutetra Ukraine jenjang kanga mejungi akümtsü.

Mongolbarnü British Foreign Secretary David Cameron-i, Congress dang Ukraine nem teyari agütsütsü sentong yanglur aliba ya agizüksü mepeshia asüngdangogo. Florida nung Tir atema Republican nominee Donald Trump den senden ka amenba sülen pai iba temepeshiba agüja liasü.

"Ukraine-i takok angutsü aser Putin tamakok angutsüba ya America aser Europe security atema kanga tongtibang lir," ta Cameron-i ashiba den, tashiyim amshia inyangshiba ajanga kecha tajangzür mangur ta Russia Tir Vladimir Putin dang sayutsü kanga tongtibang lir, ta paisa shisem.

"Iba amala jenjang magira iba ajanga tashiyim amshia Europe nung arrtsü yanglushitsü merangtsü atema Putin tali

ajungmesotsü aser iba ya Beijing, Tehran aser North Korea nunga jangja jangja angashitsü," ta Cameron-i ashi, shiba 2010 nungi 2016 küm tashi British Ato Kilonser liasü.

Kasa mapang nung Ukraine Tir Volodymyr Zelenskyy-i military teyari talila agütsütsü atema mepeshia asüngdangogo.

March 29 nü sayaba interview ka nung pai, Congress nung tetsükdaksü adoka US-i nangzükba teyari mongura Ukraine nunger sepaitem tanem tanemi atsüngzüka aotsüsa akümtsü, ta tekümdangtsü metetdaksü.

"US-i teyari magütsüra onok air defence, Patriot missiles, electronic warfare atema jammers aser 155-millimetre artillery rounds kecha maka akümtsü," ta Zelenskyy-i Washington Post dang ashi.

"Iba tetezü onok jenjang tilala agia atsüngintsüsa akümtsü. Onok takok tashi matsüngshitsü atema lenmang bushidar," ta paisa shisem.

Zelenskyy-i ashiba agi, "injang agi anünga tetezü jenjang talila magitetsü aser atsüngina front line tatsüba kümdaksütsüsa akümtsü aser iba ya raksara Russia nunger sepaitem yimti tulutemi itetsü."

Russia nunger sepaitemi February ita Avdiivka jila atsüngogo aser tanem tanemi tejakdangi odar, saka front line koba km 1000 dak tema lir iba ya ita ishika tsünga tera dang melenshir lir.

UK-i USD billion 15 dak tema military teyari agütsütsü nangzükba densema Europe nung aliba linüktemi Ukraine nem USD million 184 dak tema agütsütsü nangzükogo.

## Eid mapang Ayatollah Ali Khamenei-i Israel aser West aitsü

**Tehran, Rongchii/April 10 (Agencies):** Iran indang supreme leader-i Ramadan mapang Eid al-Fitr anogo nung jembidang Gaza nung mapa tamajung inyakba atema Israel aser West aitsü aser Syria nung Iranian consulate amakba atema tayang kepzüksü nangzük.

"Parnoki asen consulate amakdang, parnoki asen li amakba amai lir. Dangar nem timtem agütsütsü bilema aliba yimli ajanga aibelen süogo, aser aji merenshitsüla aser merenshitsü," ta Ayatollah Ali Khamenei-i Bodhbarnü Tehran nung nisung meyirijang aika adenshia alidak ashi.

Khamenei-i iba o jembiba langzüa Israel Foreign Minister Katz-i X nung Hebrew aser Persian oshi nung, "Iran-i par litsü nungi makra, Israel-i langzüksü aser Iran nung amaktsü," ta zülutsü.

Israel-i April 1 nü tayimtsü amshia Damascus nung tesem kar amakdang Syria aser Lebanon nung Islamic Revolutionary Guard Corps

(IRGC) tanishirtem tepsetba sülen Khamenei aser danga mitkar tanishirtem aser sorkar ketdangsur temi tayang kepzüksü jembida arur.

Damascus nung amakba ya Israel-i Iran litsü nung amakba den sako lir ta pai ashi, tetetzü telangzüba agütsütsü amai ajiteter.

Bodhbarnep Haifa rongnendak yimti nung drone ana amshia amak, ta Islamic Resistance in Iraq ajanga ashi.

October 7 nung Gaza nung tang rara ya tenzükbä sülen Iraq aser Syria nung United States sepaitem dak terben dak tali iba telok yagi maka arur, aser Jordan nung drone ka amshia amakdang American sepai asem tepsetba sülen tera ajema akum saka ano asendenshir amai ajiteter.

Gaza nung rara tenzükbä sülen Lebanon nung aliba Hezbollah teloki Israel mitkar den anogoshi khateper aser Yemen nung aliba Houthis telokia Red Sea nung maneni amaker.

Iran-i amaktsü teimla nung

Israel ya defence tsütsü asendenshia sepaitem, aircraft aser air defence systems tali akangshir aser bendang lima nung aliba diplomatic mission kar anir aruogo.

Iran supreme leader Khamenei-i jembidang US aser United Kingdom lenirtemi rara nung maneni yariba atema aitsü aser iba mapang teloki "America asoshi tasüba" ta ayimtena liasü.

"Taoba mapanga Western sorkar temi yimjak nung alima dang Western civilisation indang temulungsentsü tamajung sayuogo," ta pai ashi.

"Gaza nung azüdokshiba ajanga alima tesem balala nung aliba Muslim nungertem taküm temoatsü Ramadan tako nung amunger. Israel-i tetsür, tanur aser teintet rogotem tepseter, kechiaser parnoki Palestinian fighter makok," ta ashi.

Rara tenzüker Israel mitkari Gaza Strip nung tetsür aser tanur timba sür Palestine nunger nisung 33,300 dak tema tepsetogo.

## MOLUNGNEN O



20.12.1960 - 03.04.2024

Saka nibo Tsüngrem kidang aliba olive süngdong ama lir, teti tatem makai Tsüngrem yimlibilem dak ni temulung alemer. **T.Ken 52:8**

Onoki teti meima aliba **ANDREW AIER** shiranga aliba mapang aser asükhü nung Arogo, kija, kibong aser lokti tentet balala aikati nübo, shisatsü, rongsen aser tamang sarasadem agi yariogo. Nenok ajak dang kangasa pelaba lemsateper. Tsüngremi nenok ajak moshia dang moajangma ta ozü sarasadem.

- **Temiem Kinungtsü, Jala, Jabaso aser Kinungertem.**

## MOLUNGNEN O

**Ngangshi Jamir** tasüba anogo 11-04-2024 Kibuba kidang or tanü küm ka abensar. Nü temeim tamang sarasadem bilemtetdang onok temoatsü angur. Tepela talubosa aliba alima nung asenok tanaben ajuruteptsü.

~ **Kinungtsü, Chirnurtem aser adianutem.**



## Sudan nung tanur million 10 dak tema rara agi müketbanger lir

**Khartoum, Rongchii/April 10 (Agencies):** Sudan nung küm ka jungnüa rara arudang tanur million 10 dak tema raraba tesem nun glia arur, anungji rara anentsü atema yimten yimsüsür temi tekeratiba nung mera agitsüla, ta report ka ajanga ashi.

United Kingdom nung amenoka aliba Save The Children ajanga Bodhbarnü report ka adoktsüba nung, Sudan nung tanur tesadang ka tangya raraba tesem anasa lir, anungji parnok prangbong, injang-bomb, tayimtsü amshia amakba aser danga azüdokshi agi kongshitsüsa jenjang nung lir, ta shia liasü.

Iba tentet ya Armed Conflict Location and Event Data Project (ACLED) den külemi inyaka arur aser parnok indang report nung ashiba agi, rara tenzükbä ita mezüngbuba nung tanurtem azüdokshi ajurutsüsa jenjang nung aliba shilem 60 timba kumogo.

Sudan army chief Abdel Fattah al-Burhan aser paramilitary Rapid Support Forces (RSF) tekolakba Mohamed Hamdan "Hemedti" Dagalo tsüngta April 2023 nungi

yimten tashi raktepa tenzük.

April 15, 2023 nü Sudan yimtiba Khartoum nung rara tenzükbä sülen tanur million 10 dak tema tongpang balala, bomb, mortar khaloktsüba aser missiles khaloktsüba ajangshia arur aser ajidang masü civilian daka amaker ta ashir.

Azüdokshi ya timba nisung 100,000 dak tema aliba jila aser yimtittem densema nisung timba aliba tesemtem nung ataloker aser iba yongji azüdokshi ajanga tanurtem tali amokmerener, ta ashi.

"Item rara yagi tesüba küm rara mapang Sudan nung tanur aika asütsü aser yirutsüsa tensa dangi anir aoba sayur," ta iba telok indang Sudan nung tekolakba Dr Arif Noor-i ashi.

"Tensa ya 'boiling point' tongogo."

"Sudan nung tanurtemi asadangtsü makokba timtem ajuruogo - parnoki nisung tepsetba, yimtem nung injang, nisung tasümgang prokshia aliba, ki poksatsür aliba nguogo aser parnoka tepsettsü mesüra yirutsü, mesüra raratsü atema shimtsü mesüra tepang agi meshitetba timtem ajurutsü tetsübo nung alir," ta Noor-i ashi.

(**Maneni tapak 8 nung...**)

## Capital College of Higher Education asayamung tenzükogo



**Dimapur, Rongchii/April 10 (TYO):** 13buba Capital College of Higher Education Annual Sports meet 2024, State Stadium, P.R. Hill, Kohima nung tenzükogo.

College media cell sangdong ka ajanga ashiba agi, asayamung lapokba sentong nung Secretary, Central Youth, NDPP Kethose Chuzho tongti tejaoker liasü.

Sentong nung o jembiba mapang Chuzho-i kaketshir ka taküm nung saisapong kodang tongtibang iba indang lemsatop. Pai ashiba agi, saisapong ajanga shitemang aser tekolok shisatsü nung dang teyari agütsür masü saka iba ajanga social skills, communication skills aser nisung ka yimyayimpong renloka aotsü asoshi teyari agütsür.

Naga nung rongnungi Olympian Ciekrovolu Swuro aser state nungi saisapong nung takok tajung ngua

aoertem tateshitsü amshia jembiba mapang pai kaketshirtem dang state nunga saisapong ajanga pei poksüng aazüksü lenmang lir, ta ashi.

Ken o balala dak kongshia jembiba mapang Chuzho-i kaketshirtem dang entrepreneurship nung parnok career yanglutsü ajungshi. Entrepreneur ka ama Chuzho-i, aluyimba süang kechisüdir süang nisung kati koda pei poksüng aazükteta litettsü lenmang ali iba indang lemsatop.

Maneni pai kaketshirtem dang social media ya kanga junga angateta amshitsü ajungshi. Pai, Japan nung tatishitsü angazüka, libaliro azüoktsü, merekmejua alitsü aser taintem akümtsübuttsü ajungshi.

Asayamung lapokba sentong nung nungtugu wrestlers aser arm wrestlers temi shilem agi, shirnoki Arms Wrestling asaya achaayanga

liasü. Asayartem rongnung Venuzo Dawhuo, Vemele Thingo, Huluyi D Vadeo, Vekuto Curhah, Serayi Tetseo, Rukukhoto Khusoh, Kekhriesetuo Mechulho aser Sukrure Domeh nung densema liasü.

Sentong ya 6th semester nungi Mutunuzo Nyekha lenisüba nung agi, Asst. Professor, Dept. of History Niekhoto Curhah-i lokti pela agizükba o jembi aser 6th semester nungisa Tovini Kihoi ken tajung ka aten.

Maneni sentong nung Principal, CCHE Dr. Zokho Venuh-i tajungshi o jembi aser Asst. professor, Dept of Economics Akangjunla Kichu-i tatembang sarasadem agia liasü. Anogo asem asayatsü aliba CCHE asayamung ya April 12 nü tembangtsü aser asayamung shibangba sentong nung Propreitor, Life Fitness Ape Puro tetushi tejaoker asütsü.

## Neeraj Chopra Paavo Nurmi Games nung asayatsü



**Rongchii/April 10, 2024 (Agencies):** India nung nungugu javelin throw asayar Neeraj Chopra June 18 nü Turku, Finland nung Nurmi Games nung shilem agitsü, kong pa tawa 90m club-i aiba arishi küm 19 tain Germany nung asayar Max Dehning den tokteptsü, ta asayamung ayongertemi metetdaksü.

Arishi küm 26 tain Chopra, shiba iba season nung mezüngbuba May 10 nü Doha Diamond League nung asayatsü lir pai 2022 küm Paavo Nurmi Games nung silver medal (89.30m) ngua liasü, ajisüaka pa yirur aliba ajanga 2023 küm masayatet. Chopra-i tang tashi nung nület meter 89.94 tsüteta lir, koba pa indang career nung tajungtiba asütsü.

Paavo Nurmi Games ya nungtugu Finnish middle aser long-distance runner ka tenung nung jatsüba lir. Iba ya World Athletics Continental Tour Gold Series event lir aser Diamond League Meeting sülen ajak dang nungutgutiba asayamung lir.

"Javelin throw Olympic champion Neeraj Chopra June ita Turku-i meyipa arutsü.

Chopra küm ka sülen Paavo Nurmi Games nung tokteptsü, kong pa asayar tajungtibatem den asayatsü. Iba tetoktepa ya June 18 nü Turku nung Nurmi Games nung shilem agitsü, kong pa tawa 90m club-i aiba arishi küm 19 tain Germany nung asayar anidensang Arttu Salonen-i official event website ajanga metetdaksü.

"Chopra den ano onoki Germany nung Julian Weber aser Max Dehning na dena tenangzüktepa yangluogo.

February ita arishi küm 19 tain Dehning-i Halle nung German Winter Throwing Championships nung nület meter 90.2 tsüteta pa 90m adena atsüba javelin thrower rongnung tanobosang aküm. Ajisüaka pai Leiria, Portugal nung March 10 nü European Throwing Cup nungbo nület meter 80.30 dang tsüteta liasü.

Kasa mapang nung Julian Weber ya European championship tesüsabuba koker aliba asayar lir. Pai taoba season nület talangtiba atsüba meter 88.72 liasü. Pa Tokyo Olympics aser 2023 Budapest World Championships naprongla nung pezüba nung tembanga liasü.

## Monte Carlo: Djokovic, Korda &amp; Minaur nungeri takok angu



**Rongchii/April 10, 2024 (Agencies):** Tang asaya aliba Monte Carlo Masters nung Mongolbarnü world number one asayar Novak Djokovic-i Roman Safiullin straight sets nung kokogo.

Third seed asayar Carlos Alcaraz yiruba ajanga masayatetsüsa akümba sülen Djokovic-i takok nguogo.

Mezüngbuba round atema bye anguba sülen Djokovic-i iba asaya nung Russia nung unseeded asayar Safiullinya 6-1, 6-2 agi ayong ayonga koka liasü.

Indian Wells asayamung nung Italy nung asayar Luca Nardi-i tsükdaktsüba sülen mezüngbuba asayaba mapang Serbia nung asayar yagi ghonda kaser minute 10 nung

dang asaya koka liasü.

Arishi küm 36 tain Djokovic ya ATP rankings puti otsü nung world no.1 akümba asayar tambusang kümogo.

Kasa mapang nung Alcaraz teka tachichilen yiruba taneptsü junga mongutetba ajanga iba asayamung nung shilem magitsü atema telemtetba agiogo.

Arishi küm 20 tain Spain nung asayar shiba taoba ita Miami Open nung Grigor Dimitrov-i tsükdakja liasü, pa Bodhbarnü tanabuba round nung Canada nung asayar Felix Auger-Aliassime den asayatsü liasü.

Iba asayamung nung pa melena Italy nung asayar Lorenzo Sonego shimogo, shiba lucky loser ama shimba ATP-i sangdongogo.

Tebur kija asaya nungsa America nung asayar Sebastian Korda-i, mezüngbuba round nung Alejandro Davidovich Fokina 6-1, 6-2 agi ayong ayonga kokogo.

Tzünglu aruba ajanga asaya ghonda tesadang ka menor tenzükba sülen world no.11 Alex de Minaur-i minute 62 nungdang Stan Wawrinka koka liasü.

Arishi küm 39 tain Wawrinka shiba iba sayamung atema wild card ngua liasü, pa taoba mapang no. 3 asayar liasü saka tang no.79 kümogo aser pa atema Australia nung asayar ya kanga tashitait liasü aser asaya 6-3, 6-0 agi makok.

De Minaur taruba round nung Dutch nung asayar Tallon Griekspoor den asayatsü.

Maneni Spain nung asayar Roberto Bautista Agut-i lucky loser Facundo Diaz Acosta 6-2, 6-4 agi kokogo aser China nung asayar Zhang Zhizhen-i set asem asayaba sülen America nung asayar Marcos Giron kokogo.

Hubert Hurkacz-ia Britina nung asayar Jack Draper 6-4, 3-6, 7-6 (7/2) agi koka tanabuba round-i iogo.

## BENDANGLI OSANG : Tapak 7 nungi...

## Sudan nung tanur million 10 dak...

Ano tanur million aika chiyongtsü peria mangur, million 3.8 shi apok-atsü meperi aser meyerijang aika tashidak balala agi asütsü jenjang nung lir, kechiaser Sudan indang health system telaor, aser tesüba küm tanur kata school-i motet, ta Noor-i ashi.

Sudan nung nisung million 9 shi pei ki yutsür tesem balalai jena ogo aser linük tesem aika nung yawara arutsüsa lir, ta United Nations aser danga aid group temi ashir.

Yangji million pezü tanur lir

asertanur 230,000 aser tetsü tasentem yawara agi asütsüsa lir, ta report ajanga ashi.

2023 küm tatem tashinung civilian 12,000 tepsetogo ta UN-i ashir, ajisüaka asangasang nung asürtem ya iba dang nungi timba alitsü südi ta amanger.

Sudan nütsüng yongsük million 49 aliba nungi million 25 teyari nungdaka lir aser iba linük ya alima nung 'internal displacement crisis' tulutiba kumogo. UN Security Council-i ceasefire alitsü ajungshir, saka rara manener aser maziükteter.

## BILEMDANGANG

"Nü yimyayimpong agi tangar melenshidakang."